

Vinavon sin via dil success

Excellentas prestaziuns da Cla-Ursin Nufer ellas cuorsas nordicas a Campra

(cp/fmr) Allas concurrenzas da cuorsa liunga dil Swiss Cup a Campra el cantun Tessin ella vegliadetgna U18/U20 ha Cla-Ursin Nufer mussau ch'el ei actualmein en ina fetg buna fuorma. Suenten ch'il Tuatschin ei gia staus sisum il podest dalla cuorsa da 10 km dil stil liber dil Swiss Cup ad Ulrichen el Goms ei quei era reussiu ad el l'jamna vargada a Campra. Ella concurrenza da sprint dil stil classic eis el seplazzaus sil secund rang e medemamein secund eis el daventaus ella cuorsa classica cun partenza communabla. *Cla-Ursin Nufer* ei loschs da quellas prestaziuns: «Igl ei stau treis dis da cuorsa fetg variants. Jeu hai giu grond plascher dallas concurrenzas, surtut era pervia dalla topografia e las sfidas da quei tschancun.» Ils dus emprems dis ha la neiv nova procurau per cundiziuns relativamein strentgas, ferten ch'il tierz di ei allura staus signaus da relaziuns optimalas. Quels resultats ein empermettents per ils campiadadis svizzers che han liug dils 16 entochen ils 17 da schaner 2021 e lu dils 26 entochen ils 28 da mars 2021 en sia patria en Val Tujetsch. En duas jamnas ein las concurrenzas cuortas e da persecuziun, il mars lu ils sprints e las cuorsas a distanza liunga.

Ulteriuras bunas prestaziuns

Cun buns resultats ein ulteriurs Sursilvan(a)s returnai da Campra. *Niculina Nufer* ha contonschiu il 21avel rang ella cuorsa dalla tecnica libra da 7,5 km dallas damas U18/U20. *Fadri Schmid* ei daventaus 20avel ella tecnica libra e 24avel ella cuorsa dil stil classic. Il 31avel plaz ha *Jon-Fadri Nufer* contonschiu ella tecnica libra ed ella cuorsa dalla tecnica classica ei reussiu ad el il bien 14avel plaz. Tuts quater atlets ein dil Club da skis Sedrun-Tujetsch e treneschan el cader dil Sport da neiv Surselva. Cla-Ursin Nufer appartegn era al cader C da cuorsa liunga da Swiss Ski. Malgrad la situaziun cul coronavirus astgan ils atlets cun licenza da FIS trenar ed absolver concurrenzas. Quei senza aspectatur e cun risguard da claras directivas da protecziun. Autra ei la situaziun tiels sportists sut 16 onns. Quels astgan bein trenar, mo buca absolver cuorsas.